


ინფორმაციის თავისუფლების განვითარების ინსტიტუტი



საქართველო გლობალური მმართველობის ინდიკატორებში

(World Governance Indicators)



სექტემბერი, 2015

ანგარიშიში გამოთქმული მოსაზრებები ეკუთვნის ინფორმაციის თავისუფლების განვითარების ინსტიტუტს (IDFI).

შინაარსი:

შესავალი	2
გამოხატვის თავისუფლება და ანგარიშვალდებულება	6
პოლიტიკური სტაბილურობა და ძალადობის/ტერორიზმის აღმოფხვრა.....	8
ეფექტური მმართველობა	10
რეგულირების ხარისხი.....	11
კანონის უზენაესობა	13
კორუფციის წინააღმდეგ ბრძოლა	14
დასკვნა	16

შესავალი

მმართველობა თავის თავში გულისხმობს იმ ტრადიციებსა და ინსტიტუციებს, რომელთა საშუალებითაც ხორციელდება ხელისუფლება სახელმწიფოში. აღნიშნული კი მოიცავს ქვეყანაში არსებულ იმ სისტემას, რომლის საშუალებითაც აირჩევა და ხორციელდება ხელისუფლება, ასევე, ხელისუფლების უნარს, ჩამოაყალიბოს და დანერგოს ეფექტური რეფორმები, მოსახლეობის ნდობას აღნიშნული პროცესებისადმი და სხვა. გლობალური მმართველობის ინდიკატორებით (World Governance Indicators) ხდება მონაწილე სახელმწიფოთა მმართველობის სხვადასხვა ასპექტის შეფასება, ისეთი მიმართულებებით, როგორიცაა გამოხატვის თავისუფლება და ანგარიშვალდებულება, პოლიტიკური სტაბილურობა და ძალადობის/ტერორიზმის აღმოფხვრა, ეფექტური მმართველობა, რეგულირების ხარისხი, კანონის უზენაესობა და კორუფციის წინააღმდეგ ბრძოლა.¹

¹ გლობალური მმართველობის ინდიკატორები (WGI) წარმოადგენს კვლევით მონაცემთა ბაზას, რომლის იდეაც ინიცირებულ იქნა დანიელ კაუფმანისა (Natural Resource Governance Institute and Brookings Institution) და აართ კრაის (World Bank Development Research Group) მიერ 1999 წელს. კვლევის განხორციელებასა და განახლებაში ასევე მნიშვნელოვანი წვლილი შეიტანეს მასიმო მატრუცინი და პაბლო ზოიდიომ.

გლობალური მმართველობის ინდიკატორები წარმოადგენს კვლევით მონაცემთა ბაზას, რომელიც სრულად ეფუძნება სხვადასხვა გლობალურ რეიტინგებსა და შეფასებებს (მაგ. Freedom House, IREX Media Sustainability Index, Open Budget Index, World Justice Project და ა.შ. სულ 32).² აღნიშნული მონაცემები თავის მხრივ ეყრდნობა კვლევით ინსტიტუტებისა და ცენტრების, არასამთავრობო და საერთაშორისო ორგანიზაციების ისევე როგორც კერძო სექტორის წარმომადგენლების გამოკითხვის შედეგად მიღებულ მოსაზრებებსა და შეფასებებს.³ არსებული გლობალური რეიტინგების აგრეგატის გზით გლობალური მმართველობის ინდიკატორების მიერ ხდება ახალი ერთიანი მაჩვენებლების მიღება.⁴ გლობალური მმართველობის ინდიკატორებით მსოფლიოს მასშტაბით ფასდება 215 ქვეყანა. კვლევა მოიცავს პერიოდს 1996 წლიდან 2013 წლის ჩათვლით.⁵ მონაწილე სახელმწიფოთა შეფასების ექვსი ძირითადი მიმართულებებია⁶:

1. **გამოხატვის თავისუფლება და ანგარიშვალდებულება** - ფასდება ხელისუფლების არჩევის პროცესში მოქალაქეთა ჩართულობა, სიტყვის, მედიის, შეკრებისა და მანიფესტაციის თავისუფლება.
2. **პოლიტიკური სტაბილურობა და ძალადობის/ტერორიზმის აღმოფხვრა** - ფასდება მმართველობის ძალადობრივი გზით შეცვლის ალბათობა, ისევე როგორც ტერორიზმის წინააღმდეგ ბრძოლისა და ძალადობის აღმოფხვრის მიზნით განხორციელებული ქმედებები.
3. **ეფექტური მმართველობა** - ფასდება სახელმწიფო სერვისების ეფექტურობა, საჯარო სამსახურის ხარისხი და პოლიტიკური დამოუკიდებლობა.
4. **რეგულირების ხარისხი** - ფასდება სახელმწიფოს უნარი შეიმუშაოს და გაატაროს რეფორმები კერძო სექტორის განვითარების მიზნით.

² მსოფლიო მმართველობის ინდიკატორები ეფუძნება შემდეგ მონაცემთა ბაზებს - <http://info.worldbank.org/governance/wgi/index.aspx#doc-sources>.

³ მსოფლიო მმართველობის ინდიკატორები არ ასახავენ შემდეგი სუბიექტებისა და მათი აღმასრულებელი დირექტორების (ხელმძღვანელების) ოფიციალურ მოსაზრებებსა და პოზიციებს: Natural Resource Governance Institute, the Brookings Institutions, the World Bank. მონაცემები არ გამოიყენება მსოფლიო ბანკის ჯგუფის მიერ რესურსების განაწილების პროცესში გადაწყვეტილებების მიღებისას.

⁴ მონაცემთა აგრეგაციის მეთოდოლოგიის დეტალური აღწერა გთხოვთ იხილოთ შემდეგ მისამართზე - <http://info.worldbank.org/governance/wgi/index.aspx#doc-methodology>.


⁵ მსოფლიო მმართველობის ინდიკატორების კვლევითი მონაცემთა ბაზა განახლებულ იქნა 2015 წლის 25 სექტემბერს და მოიცავს მსოფლიო მასშტაბით შეფასება 2014 წლისთვის. აღნიშნული განახლება არ არის ასახული IDFI-ს მიმდინარე კვლევაში. 2014 წლის მონაცემებს დაეთმობა ორგანიზაციის ახალი კვლევა, რომელიც ჩვენს ვებ-გვერდზე უახლოეს მომავალში გამოქვეყნდება.

⁶ მსოფლიო მმართველობის ინდიკატორების დეტალური მეთოდოლოგია ხელმისაწვდომია შემდეგ მისამართზე - http://papers.ssrn.com/sol3/papers.cfm?abstract_id=1682130.

5. **კანონის უზენაესობა** - ფასდება მთავრობის მოქმედებების კანონის ნორმებთან შესაბამისობა, სასამართლო ხელისუფლების პატივისცემა, ყურადღება მახვილდება სამართალდარღვევათა და დანაშაულის სტატისტიკაზე.
6. **კორუფციის წინააღმდეგ ბრძოლა** - ფასდება მმართველი ძალების მიერ საკუთარი უფლებამოსილების გამოყენების პრაქტიკა პირადი ინტერესებისთვის. შეფასება მოიცავს როგორც კორუფციას ქვედა დონეზე, ისევე, როგორც ელიტური კორუფციის შეფასებას.


რაც შეეხება საქართველოს გლობალური მმართველობის ინდიკატორებში, უნდა ითქვას, რომ **1996 წლიდან 2013 წლამდე პერიოდში, სახელმწიფოს მნიშვნელოვანი პროგრესი აქვს მიღწეული უკლებლივ ყველა ექვსი მიმართულებით.** განსაკუთრებით მნიშვნელოვანი გაუმჯობესება შეინიშნება კორუფციის წინააღმდეგ ბრძოლის, კანონის უზენაესობის, რეგულირების ხარისხისა და ეფექტური მმართველობის ინდიკატორებში, სადაც 1996 წლიდან 2013 წლამდე პერიოდში ზრდის განსაკუთრებით მაღალი მაჩვენებლები ფიქსირდება.

საქართველოს მიერ განვლილი პროგრესი



რაც შეეხება 2013 წლისთვის არსებულ მდგომარეობას, უნდა ითქვას, რომ ყველაზე მაღალი შეფასება სახელწიფოს ეფექტური მმართველობისა (69.4%) და რეგულირების ხარისხის (73.7%) მხრივ აქვს მინიჭებული, ყველაზე დაბალი 30.8%-იანი რეიტინგი კი ქვეყანას პოლიტიკური სტაბილურობისა და ძალადობის აღმოფხვრის ინდიკატორში აქვს მინიჭებული.

**საქართველოს შეფასება გლობალური მმართველობის
ინდიკატორებში
2013 წელი**




გამოხატვის თავისუფლება და ანგარიშვალდებულება

გლობალური მმართველობის ინდიკატორის თანახმად 1996 წლიდან 2013 წლამდე სტაბილურად იზრდებოდა საქართველოში გამოხატვის თავისუფლების პატივისცემისა და ანგარიშვალდებულების მაჩვენებელი. კერძოდ თუ 1996 წელს ის 36.1% შეადგენდა 2013 წელს მაჩვენებელმა 54.5%-ს მიაღწია.

აღსანიშნავია, რომ გლობალური მმართველობის ინდიკატორის მიხედვით 1996 წლიდან 2013 წლამდე გამოხატვის თავისუფლებისა და ანგარიშვალდებულების მხრივ ყველაზე დიდი გაუმჯობესება რუანდის რესპუბლიკის შემთხვევაში შეიმჩნევა, შემდეგ პოზიციებს კი ყატარი

და სიერე ლეონე იკავებენ. საქართველო მოცემულ რეიტინგში მე-12 ადგილზეა 189 ქვეყანას შორის. შესაბამისად ცხადია, რომ ქვეყანას ერთ-ერთი მოწინავე ადგილი უკავია განვლილი პროგრესის მხრივ. ამასთან, აღსანიშნავია, რომ გამოხატვის თავისუფლებისა და ანგარიშვალდებულების ასპექტში გაუმჯობესების საუკეთესო მაჩვენებელი მეზობელ ქვეყნებს შორის სწორედ საქართველოს აქვს, 18.4%-იანი ზრდის მაჩვენებლით. აღსანიშნავია, რომ განვლილი პროგრესის მხრივ მსოფლიო რეიტინგში ერთ-ერთ ბოლო პოზიცია უკავია რუსეთის ფედერაციას, სადაც გამოხატვის თავისუფლებისა და ანგარიშვალდებულების მხრივ შემცირება 21.9%-იანი რეგრესი.

**გამოხატვის თავისუფლება და ანგარიშვალდებულება
განვლილი პროგრესი
საქართველო და მეზობელი ქვეყნები**




აღსანიშნავია, რომ 2013 წლის მონაცემებით საქართველოს შეფასებულ 212 სახელმწიფოს შორის გამოხატვის მიმართულებით 97-ე ადგილი უკავია. რეიტინგში პირველ ადგილს ნორვეგია იკავებს 100% მაჩვენებლით, შემდეგ ადგილებზე კი 99%-ით არიან ჩრდილოეთ ევროპის ისეთი ქვეყნები, როგორებიცაა დანია და შვედეთი.

აღსანიშნავია, რომ საქართველოს გლობალურ რეიტინგში მოწინავე ადგილი უკავია საკუთარ რეგიონში და საგრძნობლად უსწრებს მეზობელი ქვეყნების რუსეთის, თურქეთის, აზერბაიჯანისა და სომხეთის შეფასებებს.

საქართველოსა და მეზობელი ქვეყნების მაჩვენებლის შედარება

გამოხატვის თავისუფლება და ანგარიშვალდებულება




პოლიტიკური სტაბილურობა და ძალადობის/ტერორიზმის აღმოფხვრა

სხვა ინდიკატორების მსგავსად, პოლიტიკური სტაბილურობისა და ტერორიზმის/ძალადობის აღმოფხვრის კუთხით საქართველო შეფასებულია როგორც მდგრადად განვითარებადი სახელმწიფო. კერძოდ თუ 1996 წლის მდგომარეობით ქვეყანა აღნიშნულ ინდიკატორში 6.7% იყო შეფასებული, 2013 წელს შეფასება საგრძნობლად არის გაზრდილი და 30.8% უტოლდება. შეფასებულ ქვეყნებს შორის საქართველოს 151-ე ადგილი უკავია. აღსანიშნავია რომ მოცემული ინდიკატორის ფარგლებში რეიტინგში პირველ ადგილზე არის გრელანდია (დანიის ავტონომიური რესპუბლიკა). წამყვანი პოზიციები უკავიათ ასევე ისეთ ქვეყნებს, როგორებიცაა ლიხტენშტაინი, შვეიცარია, ფინეთი, ახალი ზელანდია და სხვ.

აღსანიშნავია, რომ განვლილი პროგრესის მხრივ ქვეყანას მსოფლიოს მასშტაბით 10-ე ადგილი უკავია, ხოლო პირველია მეზობელ ქვეყნებს შორის.


პოლიტიკური სტაბილურობა და ძალადობის/ტერორიზმის აღმოფხვრა
განვლილი პროგრესი
საქართველო და მეზობელი ქვეყნები



მეზობელ ქვეყნებთან შედარებით, საქართველო მაჩვენებელი საგრძნობლად აღემატება რუსეთისა და თურქეთის მაჩვენებლებს, თუმცა ჩამორჩება სომხეთსა და აზერბაიჯანს.

საქართველოსა და მეზობელი ქვეყნების მაჩვენებლის შედარება

პოლიტიკური სტაბილურობა და ძალადობის/ტერორიზმის
აღმოფხვრა




ეფექტური მმართველობა

შეფასების ექვს ინდიკატორს შორის ერთ-ერთი საუკეთესო შედეგი საქართველოს ეფექტური მმართველობის მხრივ აქვს მინიჭებული. კერძოდ ამ მხრივ ხელისუფლების საქმიანობა 2013 წელს 69.4%-ით არის შეფასებული. აღსანიშნავია რომ აღნიშნულ ინდიკატორში ყველაზე დაბალი მაჩვენებელი ქვეყნას 2002 წელს აქვს მიღებული, მაშინ როდესაც ის 19.5% უტოლდებოდა. 69.4%-იანი შეფასებით საქართველო გლობალურ რეიტინგში 210 ქვეყანას შორის 65-ე ადგილს იკავებს. მოცემულ შემთხვევაშიც წამყვანი ადგილ რეიტინგში უკავიათ ჩრდილოეთ და ცენტრალური ევროპის ისეთ ქვეყნებს, როგორებიცაა ფინეთი, დანია, შვედეთი, ნიდერლანდების სამეფო, შვეიცარია, ნორვეგია. წამყვანი პოზიციები უკავიათ ასევე ახალ ზელანდიასა და სინგაპურს.

აღსანიშნავია, რომ გლობალური მასშტაბით ერთ-ერთი მოწინავე მეორე პოზიცია უკავია საქართველოს ეფექტური მმართველობის მხრივ განვლილი პროგრესის თვალსაზრისით. კერძოდ, ქვეყნას ამ მხრივ 41.6%-იანი პროგრესი აქვს მიღწეული. მოცემული კრიტერიუმით საქართველო პირველია მეზობელ ქვეყნებს შორისაც.

ეფექტური მმართველობა განვლილი პროგრესი საქართველო და მეზობელი ქვეყნები



ეფექტური მმართველობის მხრივ საქართველოს წამყვანი პოზიცია უკავია საკუთარ მეზობელ ქვეყნებს შორის. აღსანიშნავია, რომ შეფასებით საქართველოს საგრძნობლად ჩამოუვარდებიან ისეთი ევროპული ქვეყნები, როგორიცაა იტალია, საბერძნეთი, რუმინეთი და ბულგარეთი.

საქართველოსა და მეზობელი ქვეყნების მაჩვენებლის შედარება ეფექტური მმართველობა




რეგულირების ხარისხი

შეფასების ინდიკატორებს შორის ერთ-ერთი ყველაზე მაღალი ქულა საქართველოს რეგულირების ხარისხში აქვს მინიჭებული და ის 73.7 %-ს უტოლდება. აღსანიშნავია, რომ მსგავსად სხვა ინდიკატორებისა 1996 წლიდან 2013 წლამდე ქვეყნის მაჩვენებელი სტაბილურად იმატებდა. 2013 წლის მონაცემებით საქართველო შეფასებულ 210 ქვეყანას შორის 56-ე ადგილზეა. რეგულირების ხარისხის მხრივ მსოფლიოში წამყვანი პოზიციები უკავიათ სინგაპურს, ჰონგ კონგს (ჩინეთის სპეციალური ადმინისტრაციული ერთეული), ახალ ზელანდიას, შვეიცარიას, ფინეთსა და დანიას. აღსანიშნავია, რომ მოცემულ ინდიკატორში საქართველო საგრძნობლად უსწრებს ისეთი ქვეყნების მაჩვენებლებს როგორებიცაა საბერძნეთი, სლოვენია, რუმინეთი, ბულგარეთი, ხორვატია, მოლდავეთი, უკრაინა და სხვა.

ხაზი უნდა გაესვას იმას, რომ 1996 წლიდან 2013 წლამდე განცდილი პროგრესის თვალსაზრისით საქართველო პირველი ქვეყანაა გლობალური მასშტაბით ე.ი. მოცემული პერიოდის განმავლობაში ქვეყანას აქვს ყველაზე მნიშვნელოვანი პროგრესი განცდილი რეგულირების ხარისხის მიმართულებით. ქვეყნის მიერ მიღწეული გაუმჯობესება მნიშვნელოვნად აღემატება მეზობელი ქვეყნების მაჩვენებლებსაც.


რეგულირების ხარისხი
განვლილი პროგრესი
საქართველო და მეზობელი ქვეყნები



მოცემულ ინდიკატორშიც საქართველოს მაჩვენებელი მოწინავეა მეზობელ ქვეყნებს შორის. ამასთან, რეიტინგში საქართველოსთან შედარებით დაბალი ქულები აქვთ მინიჭებული ისეთ ქვეყნებს, როგორებიცაა საბერძნეთი, სლოვაკეთი, რუმინეთი და ხორვატია.

საქართველოსა და მეზობელი ქვეყნების მაჩვენებლის შედარება

რეგულირების ხარისხი



კანონის უზენაესობა

2013 წლის მდგომარეობით საქართველოში კანონის უზენაესობა 53.6%-ით არის შეფასებული. ხაზგასასმელია, რომ 1996 წლიდან მოცემული ინდიკატორი 46%-ით არის გაუმჯობესებული. შეფასებულ 212 სახელმწიფოს შორის საქართველო 99-ე პოზიციაზეა. კანონის უზენაესობის მხრივ, რეიტინგში წამყვანი პოზიციები კვლავაც ჩრდილოთ ევროპის ქვეყნებს ნორვეგიას, ფინეთსა და შვედეთს უკავიათ.


უნდა ითქვას, რომ კანონის უზენაესობის ინდიკატორში განცდილი პროგრესის მხრივ საქართველო მსოფლიოს მასშტაბით მეორე ადგილზეა და წამყვანი პოზიცია უკავია საკუთარ მეზობელ ქვეყნებს შორის.

კანონის უზენაესობა
განვლილი პროგრესი
საქართველო და მეზობელი ქვეყნები



უნდა ითქვას, რომ მეზობელ ქვეყნებს შორის კანონის უზენაესობის ინდიკატორში საქართველოს მცირედით უსწრებს მხოლოდ თურქეთი. რუსეთს კი საგრძნობლად დაბალი 24.6%-იანი მაჩვენებელი აქვს მინიჭებული.

საქართველოსა და მეზობელი ქვეყნების მაჩვენებლის შედარება




კორუფციის წინააღმდეგ ბრძოლა

გლობალური მმართველობის ინდიკატორებს შორის 1996 წლიდან საუკეთესო პროგრესი საქართველოში კორუფციის კონტროლის მხრივ შეინიშნება. კერძოდ თუ 1996 წლის მონაცემებით ქვეყანა კორუფციის კონტროლის მხრივ 9%-ით იყო შეფასებული 2013 წელს შეფასებამ 66.5%-მდე მოიმატა. შედეგად შეფასებულ 210 სახელმწიფოს შორის საქართველოს 71-ე პოზიცია უკავია. აღნიშნული მაჩვენებლით საქართველო საგრძნობლად უსწრებს ჩეხეთს, უნგრეთს, იტალიას, საბერძნეთს, სლოვაკეთს, ბულგარეთს და ლატვიას.

აღსანიშნავია, რომ კორუფციის წინააღმდეგ ბრძოლის მხრივ საქართველოს აქვს ყველაზე მეტი პროგრესი მიღწეული სხვა შეფასებულ ქვეყნებს შორის. ქვეყანას მოწინავე ადგილი უკავია რეგიონული მასშტაბითაც.


კორუფციის კონტროლი
განვლილი პროგრესი
საქართველო და მეზობელი ქვეყნები



მეზობელ ქვეყნებს შორის საქართველოს უკავია პირველი ადგილი კორუფციის წინააღმდეგ ბრძოლის მხრივ. ყველაზე დაბალი მაჩვენებელი კი აქვს რუსეთს 1.14%-ით.

საქართველოსა და მეზობელი ქვეყნების მაჩვენებლის შედარება

კორუფციის კონტროლი



დასკვნა

როგორც კვლევამ აჩვენა, საქართველოს მნიშვნელოვანი პროგრესი აქვს მიღწეული გლობალური მმართველობის ყველა ინდიკატორში. მსოფლიო მასშტაბით საქართველოს პირველი ადგილი უკავია განვლილი პროგრესის მხრივ ისეთ სფეროებში, როგორიცაა კორუფციის წინააღმდეგ ბრძოლა და რეგულირების ხარისხი (რომლითაც ფასდება სახელმწიფოს უნარი შეიმუშაოს და გაატაროს რეფორმები კერძო სექტორის განვითარების მიზნით). 1996 წლიდან 2013 წლამდე მიღწეული პროგრესის თვალსაზრისით, საქართველოს მეორე ადგილი უკავია ისეთ ინდიკატორებში, როგორებიცაა ეფექტური მმართველობა და კანონის უზენაესობა.

ამასთან, როგორც ეს საქართველოს მეზობელ ქვეყნებთან შედარებამ ცხადყო, მიღწეული პროგრესის მხრივ, საქართველოს პირველი ადგილი უკავია უკლებლივ ყველა ინდიკატორში რეგიონული მასშტაბით.

აუცილებელია ხაზი გაესვას იმასაც, რომ რიგ ინდიკატორებში საქართველო არ ჩამოუვარდება ცენტრალური და სამხრეთ ევროპის ისეთი ქვეყნების შეფასებებს, როგორიცაა ჩეხეთი, სლოვაკეთი, იტალია, საბერძნეთი, მაკედონია, უნგრეთი, ბულგარეთი და სხვა.

საქართველოს ასევე მოწინავე პოზიცია უკავია ისეთ საერთაშორისო შეფასებებში, როგორიცაა მსოფლიო სამართლის ინიციატივის მიერ 2015 წლის მარტში გამოქვეყნებული ღია მმართველობის ინდექსი.⁷ აღნიშნული ინდექსის მიხედვით, საქართველოს მინიჭებული აქვს 0.61 შეფასება უმაღლესი 1 ქულიდან. მოცემული რეიტინგით, საქართველოს აღმოსავლეთ ევროპისა და ცენტრალური აზიის 13 ქვეყანას შორის პირველი პოზიცია უკავია, ხოლო მსოფლიო მასშტაბით კი 102 ქვეყანას შორის 28-29-ე ადგილებს ინაწილებს იტალიასთან. ამ შედეგით საქართველო უსწრებს ისეთ ევროპულ სახელმწიფოებს, როგორიცაა: სლოვენია, მაკედონია, საბერძნეთი, ხორვატია. ქვეყნებმა, რომლებმაც უმაღლესი შეფასებები მიიღეს არიან: შვედეთი, ახალი ზელანდია, ნორვეგია, დანია და ნიდერლანდები.⁸

საქართველო ასევე აქტიურად მონაწილეობს ღია მმართველობის პარტნიორობის ინიციატივაში.⁹ კერძოდ, საქართველო 2014 წელს არჩეულ იქნა OGP-ის მმართველ კომიტეტში,¹⁰ ხოლო საქართველოს აღმასრულებელი და საკანონმდებლო ხელისუფლება აღებული და შესრულებული ვალდებულებების მიხედვით ერთ-ერთი გამორჩეულ ქვეყანას წარმოადგენს ინიციატივაში მონაწილე სახელმწიფოებს შორის. საქართველოს სამოქმედო

⁷ <http://data.worldjusticeproject.org/opengov/>.

⁸ <https://idfi.ge/ge/open-government-index-2015>.

⁹ <https://ogpgeoblog.wordpress.com/>.

¹⁰ <https://idfi.ge/ge/elections-of-ogp-steering-committee-and-georgia>.

გეგმის ¹¹ ფარგლებში აღებული აქვს მნიშვნელოვანი ვალდებულებები, რომელთა განხორციელებაც უზრუნველყოფს ქვეყნის შემდგომ განვითარებას ისეთ სფეროებში როგორებიცაა საჯარო ინფორმაციის ხელმისაწვდომობა, მოქალაქეთა ჩართულობა, ანტიკორუფციული მექანიზმების დანერგვა, ინტერესთა კონფლიქტი, საჯარო სერვისების ხელმისაწვდომობა, თანამდებობის პირთა დეკლარაციების სისტემა და სხვა.

ყოველივე ზემოთაღნიშნული უდავოდ მიუთითებს იმაზე, რომ მიუხედავად არსებული როგორც საშინაო პრობლემებისა, ისე ქვეყნის გარეთ არსებული პოტენციური საფრთხეებისა, ქვეყანა საერთაშორისო დონეზე, აღქმულია, როგორ ერთ-ერთი ყველაზე სწრაფად განვითარებადი სახელმწიფო. მიუხედავად ამისა, ძალზედ მნიშვნელოვანია, რომ აღნიშნული ატარებდეს მდგრად ხასიათს. IDFI იმედოვნებს, რომ საქართველო არც მომდევნო წლებში ასცდება სწრაფი განვითარების გეზს, რაც შემდგომში აისახება გლობალური მართველობის მსოფლიო ინდიკატორებშიც.

¹¹ <http://justice.gov.ge/Multimedia%2FFiles%2FOGP%2FOGP%20AP%202014-2015.pdf>.